

SİMM SİMMM SİMAÎL



Arjen Arî

'Ji ber ku vê civakê gotiye,
"şûna xencerê rehet dibe, ya
peyvê dimîne", Xweda şahide;
tu wext û dewranan min
nexwestiye 'şûrê peyvê' ji bilî
dujmin- li siya tu sawêrî hildim.
Li derûdorê bi qasî ku mîna
mirovekî "zimandirêj" tême bi
navkirin jî- mafdar in; ji ber ku
ez jî neviyekî Cegerxwîn im-
heta ji min hatibe, berî gotinê,
min peyv bi "gaza mêjî"
"pîvaye" û bi "şehîna" dil
"teqillandiye". Ji vê yekê, dibêjim:
*Peyv hene; mîna "şiqamekê" 'li
dev û rûyê mirov dikevin.
Peyv hene; cemed in, mîna qeşayê
sar.*

Dilşaker in hinin; dil "miftî
belaş" dikirin.
*Hin dil-xelên in, aqil ji ser dibirrin
Pirpirînek in hin; dilê kulîlkê seh
dikin.
Hin bi devê xwedî bi per û bask
dibin
Eylo ne hinek bilind bilind difirin
Hinek ker î kerikî weke ku bizirin
Kelê ne hin, mislê savara rijî!*

*Hin naçin xwarê tu rûn lê birêjî
Çavan dineqînin, hin vexwedîner
in.*

*Hin miruskirî, reş reş, dîq dinerin
Siviktir ji qirş, hin qirûşek
nakin.*

*Hin zêrê zer bi yaqut beramber in
Tu çi bibêjî bêj; kin lê de ne dirêjkî
Bibêj û bipêj, bes şuşê dil
meşkî...!*

Peyv jî weke tepizkê ye. Bi
hemd, bê hemd carinan ji devê
mirov dipeke.

Bi pekîne re tiştêk dişikê: şuşê
dil!

Û gotine: "ku dil şikest,
nacebire".

Ji vê rastiyê; pirrê caran meriv
berî gotinê ji yê li pêşberî xwe re
vê dibêje: dilê xwe megire;
lê belê...

Ev "lê belê" dikeve şûna mertalê
xweparastinê; xwediyê peyvê li
yê li hember degeltir dike.

Jixwe weke gellek tiştên din; di
çanda kurdan de derbarê

axaftin/gotin/rabûnûrûniştin
û peyvê de 'zagonin nenivîskî"
hene, û ev "zagon"dikin ku
kesên ji vê civakê di cem'etakê
de di nava wan sînoren ku berî
û bêyî wan hatine kêşan de,
tevbigerin.

Li hêla din berî min gotine:"Sim
sim Simaîl"

Yanî kurt lêde.Yanî; tu çi bibêjî
bibêj, kin û kurtê vê "ha kevir li
serî ha serî li kevir"e.

Ez ê "kevirê xwe di ber xwe re
bernedim" û ez ê bidomînim:
Di civakeke ku ji "qal û belayê
"de daye dû rizgariyê,û hê nû
nû bi ser rêç û şivîleyine azadî
û xwenasiyê vedibe de; şaîr ku
ne qurre be, peyveke vî nîn be
bo gotinê... şa'ir e?

Min ji dostekî xwe bihîst; li
Îranê keçeke ku nikaribe çend
rist û bendan ji Hafiz jiber
bixwîne tê wê maneyê ku ew
kiç hê "kamil" nebûye.
Şa'irtiya Hafiz li hêlekê, bi min
şa'ir ew e; peyva xwe di gel
dujminê xwe, li gel dostên xwe
texsîr neke; ku karibe ji
dujminê xwe re bibêje"rahije
teşkên xwe, derkeve ji welatê
min" li hêla din li dostên xwe
vegere, bibêje:

*Cotek pêlavên reş li min in
Bi pîne,sivik,erzan...gemarî û
heram
Hezar car ev pî û ev pî bi hev
guherîne*

*Çi cara ez li wan dinerim
Ne bi destê min e
Serê pêlavê pozê hin serokên kurd
tîne bîra min!**

Peyveke pêşiyar e, wan gotiye
wan hiştiye:Kuçik hestî dixwe,
hesabê qûna xwe dike.
Ya min jî tiştêkî wisa ye.
Di bernameyeke heyva borî de
ku Komelaya Çira li Amedê
amede kiribû,min ev got:
Ez bi girr û înad li ser vê xakê
mam. Derfetên ku sed carî
karibim herim û venegerim
ketin destên min. Min weke
jîngeh her ev ax hilibijart. Lê; ne
meqbûr im ku li vir, li ser vê
axê, di nav we de bimrim.
Bindestiya min qetek ji
bindestiya we ye. Ez bi xwe
azad im; azadekî li gel we
hêsîr! Û hûn qet ne meqbûr in ji
min hez bikin, ji ber ku ez ji we
û vê axê hez dikim.
Ez ji bo xwe û ji xwe ji vê axê
hez dikim. Ne ji axê bi tenê: ji
kulîlkên li ser vê xakê, ji
hewayaya wê, ji roj û şewa wê...
xasma ji çiyayên wê; ji dar û
deviyan, ji zeviyên rû-nîsan, ji
gundên mil-perîşan...

Weke her bûnewerî ez jî bi hezê
pir dibim.
Ji min hez neke jî ez ji yarê hez
dikim.
Hez dareke bilinde li gorî min,
pirşax û pirgulî.

Ku ji vê axê hez kiribim/bikim
ji mafê mine dil bidim; li ser
xakê bi heza wê re, bi ya dara
berûyê re, bi hezkirina gundekî
re heza xwe/hêza xwe mezintir
bikim...

Lê; ji kerema xwe, bo ku ji vî
welatî hez dikim, ji min hez
nekin!

Bo çi?!

Bo ku hez nayê bazarê.

Bo çi?

Bo ku bi hez dil-sa ye, direye re.

Bo çi?

Bo ku hez bi bazarê dilewite.

Bo çi?

Bo ku Ehmedê Xanî; Seydayê

Seydayê min Cegerxwîn gotiye:

.....

Şûrê hunera me bête danîn

Qedrê qelema me bête zanîn

Kafir bûyîn em bi ismê Qehhar

Xeffar e ku em kirin gunehkar

û domandiye:

.....

Hisna nebitin çu hed- û xayet

Na bit ji xwe aşiqan nîhayet

Lê aşiq û bulhewes cuda ne

*Hin faîdexwaz û hin fîda ne.***

Di ser van ristan de 312 sal

bihurîn. Wî qewmî, vî qewmê

hêsîr û bêbîr ferq nekir ka kî

xwediyê "'şûrê huner" e, ka

qedrê "qelemê" kê bizane; "hed-

û xayeta" kê çi ye, kî "aşiq" e, kî
"bulhewes" e; "faîdexaz" kî ye,
kî "fîda" ye...

Ez bejna xwe jî, qama helbesta
xwe jî peyv bi peyv, rist bi rist

li ber giyanê "fîda" yan

diçimînim, ditewînim...

Lê li hember "bulhewes" û

"faîdexwazan"?

Min belengazî çarînek heye, ku

mebesta min bi vê çarîne ne ew

e ku li vir "teriya" helbesta xwe

bi ya Xanî re, bi ya Cegerxwîn

re bîqusînim e:

min ziman kir kefarete di ber şîr
de

min xwîn kir kefarete di ber şûr
de

serê'm neçimiya, enî nizm nebû

*ne ji Zahir re, ne jî ji tûr re****

Tûr neman, cuher jî...

Mabin jî- ku mane- serê xwe

têxî "cuherê" kê, dibî "kerê" wî!

Êê.. şa'ir û keritî?

Ma ne, me sernavê nivîsa xwe

kiribû "Simm Simmm Simaîl"?

*Birakuji, Abdula Peşew, Wş. Avesta, rp 13

**Mem û Zîn, Ehmedê Xanî, Wş Hasat, rp
50- 92

***A.Arî

